

四庫全書

集部

欽定四庫全書

御定歷代賦彙卷九十五

音樂

笛賦

周宋玉

余嘗觀於衡山之陽見奇篠異幹罕節間枝之叢生也
其處磅礴千仞絕谿陵阜隆崛萬丈磐石雙起丹水涌
其左醴泉流其右其陰則積雪凝霜霧露生焉其東則
朱天皓日素朝明焉其南則盛夏清微春陽榮焉其西

則涼風遊旋吸遼存焉榦枝洞長桀出有良工焉名高
師曠將爲陽春北鄙白雪之曲假塗南國至此山望其
叢生見其異形曰命陪乘取其雄焉得其雌焉將送荆
卿於易水上乃使王爾公輸之徒合妙意角較手遂以
爲笛於是天旋少陰白日西靡命巘香使午子延長頸
奮玉指摛朱脣曜皓齒頰顏臻玉貌起吟清商追流徵
歌伐檀號孤子發圓轉舒積鬱其爲幽也甚乎懷永抱
絕喪夫天亡稚子纖悲微痛毒離腠理激叫入青雲慷

慨切窮士列弦節武毅發沉憂結呵鷹揚叱太一聲淫
淫以黯黹氣旁合而爭出歌壯士之必往悲猛勇乎飄
疾麥秀漸兮鳥聲譁兮招伯奇於源陰追申子於晉域
夫奇曲雅樂所以禁淫也錦繡黼黻所以禦寒也縟則
泰過是以檀卿刺鄭聲周人傷北里也亂曰芳林皓榦
有奇寶兮博入通明樂斯道兮般衍瀾漫終不老兮雙
林間麗貌甚好兮八音和調成稟受兮善善不衰爲世
保兮絕鄭之遺離南楚兮美風洋洋而暢茂兮嘉樂悠

長俟賢士兮鹿鳴萋萋思我友兮安心隱志可長久兮

長笛賦

有序

漢馬融

融既博覽典雅精核數術又性好音律能鼓琴吹笛而爲督郵無留事獨卧郿縣平陽鄔中有雒客舍逆旅吹笛爲氣出精列相和融去京師踰年暫聞甚悲而樂之追慕王子淵枚乘劉伯康傳武仲等簫琴笙頌唯笛獨無故聊復備數作長笛頌其辭曰

惟鍾籠之奇生兮於終南之陰崖託九成之孤岑兮臨

萬仞之石礪特箭橐而莖立兮獨聆風於極危秋潦漱
其下趾兮冬雪揣封乎其枝巔根時之槲削兮感迴飈
而將頽夫其面旁則重巘增石簡積頽砭兀婁犴髣傾
旻倚伏摩窳巧老港洞坑谷解壑澮峬嶠窳巖覆運裒
穿汝岡連嶺屬林簫蔓荆森慘柞撲於是山水猥至渟
渟障潰頸淡滂流確投澆穴爭湍草縈汨活澎渙波澗
鱗淪衆隆詭戾瀉瀑噴沫犇遯礪突搖演其山動杌其
根者歲五六而至焉是以間介無蹊人跡罕到猿雌晝

吟鼯鼠夜叫寒熊振頷特慶昏髡山雞晨羣野雉朝雊
求偶鳴子悲號長嘯由衍識道噍噍謹譟經涉其左右
唯聒其前後者無晝夜而息焉夫固危殆險巖之所迫
也衆哀集悲之所積也故其應清風也纖末奮箝錚鏘
營囑若絙瑟促柱號鐘高調於是放臣逐子棄妻離友
彭胥伯奇哀姜孝已攢乎下風收精注耳雷歎頽息搯
膺擗標泣血泣流交橫而下通旦忘寐不能自禦於是
迺使魯般宋翟構雲梯抗浮柱蹉纖根跋葢縷膺隋阼

腹陘阻逮乎其上匍匐伐取挑截本末規摹黠矩夔襄
比律子野協呂十二畢具黃鍾爲主撝揉斤械剗剡度
擬總硃頽墜程表朱裏定名曰笛以觀賢士陳於東階
八音俱起食舉雍徹勸侑君子然後退理乎黃門之高
廊重丘采灌名師郭張工人巧士肄業修聲於是游閑
公子暇豫王孫心樂五聲之和耳比八音之調迺相與
集乎其庭詳觀夫曲屑之繁會叢雜何其富也紛葩爛
熳誠可喜也波散廣衍實可異也穿距劫還又足怪也

啾咋嘈啐似華羽兮絞灼激以轉切震鬱怫以憑怒兮
眩矚駭以奮肆氣噴勃以布覆兮乍踣蹠以狼戾雷叩
鍛之炭峇兮正瀏漂以風冽寒薄湊會而凌節兮馳趣
期而赴躡爾迺聽聲類形狀似流水又象飛鴻汜濫溥
漠浩浩洋洋長轡遠引旋復迴皇充屈鬱律瞋菌礪挾
鄴琅磊落駢田磅礴取予時適去就有方洪殺衰序希
數必當微風纖妙若存若亡蓋滯抗絕中息更裝奄忽
滅沒嗟然復揚或迺聊慮固護專美擅工漂淩絲簧覆

冒鼓鐘或迺植持縱纏佻儼寬容簫管備舉金石並隆
無相奪倫以宣八風律呂既和哀聲五降曲終闕盡餘
絃更興繁手累發密櫛疊重躡蹻攢仄蜂聚蟻同衆音
猥積以送厥終然後少息暫怠雜弄間奏易聽駭耳有
所拙演安翔駘蕩從容闡緩惆悵怨懣窳圖寘赦聿皇
求索乍近乍遠臨危自放若頽復反蚡緼蟠紆纏冤蜿
蟠笏笏抑隱行入諸變絞概汨湮五音代轉按拏按臧
遞相乘遭反商下徵每各異善故聆曲引者觀法於節

奏察度於句逗以知禮制之不可踰越焉聽筮弄者遙思於古昔虞志於怛惕以知長戚之不能閒居焉故論記其義協比其象彷徨縱肆曠濫敞罔老莊之概也溫直優毅孔孟之方也激朗清厲隨光之介也牢剌拂戾諸賁之氣也節解句斷管商之制也條決續紛申韓之察也繁縟絡繹范蔡之說也勞擽鉅慥哲龍之惠也上擬法於韶箛南籥中取度於白雪淶水下采制於延露巴人是以尊卑都鄙賢愚勇懼魚鼈禽獸聞之者莫不

張耳鹿駭熊經鳥伸鵠視狼顧拊譟踊躍各得其齊人
盈所欲皆反中和以美風俗屈平適樂國介推還受祿
澹臺載尸歸臯魚節其哭長萬輟逆謀渠彌不復惡蒯
賁能退敵不占成節鄂王公保其位隱處安林薄官夫
樂其業士子世其宅鰾魚喁於水裔仰駟馬而舞玄鶴
於斯時也縣駒吞聲伯牙毀絃瓠巴聃柱磬襄弛懸留
眎瞠眙累稱屢讚失容墜席搏拊雷抃焦眇睢維涕洟
流漫是故可以通靈感物寫神喻意致誠效志率作興

事溉盥汙穢澡雪垢滓矣昔庖犧作琴神農造瑟女媧
製簧暴辛爲埙倕之和鐘叔之離磬或鑠金礱石華琬
切錯九挺雕琢刻鏤鑽笮窮妙極巧曠以日月然後成
器其音如彼惟笛因其天姿不變其材伐而吹之其聲
如此蓋亦簡易之義賢人之業也若然六器者猶以二
皇聖哲黈益况笛生乎大漢而學者不識其可以裨助
盛美忽而不讚悲夫有庶士丘仲言其所由出而不知
其弘妙其辭曰近世雙笛從羌起羌人伐竹未及巴龍

鳴水中不見已截竹吹之聲相似刻其上孔通洞之裁
以當邁便易持易京君明識音律故本四孔加以一君
明所加孔後出是謂商聲五音畢

笛賦

唐

闕名

南鄰退食兮北里朝迴門列長戟兮庭張吹臺珠簾半
掩兮錦筵四開蛾睂戾止兮寶笛爰來狎主人與愛客
侑珍羞及玉杯方見稱於嘉賓因得搜其所徵厥草創
自羌首更尚本乎所營伐竹之貞寫龍之吟宰匠於是

董制伶倫於是審聽狀以材力質來正直是揮刀斧乃
約繩墨斷絕肌膚剖穿胃臆周繞運同短長合得器雖
蹈乎舛庸性故傷於剗刻故知懷寶者見毀抱明者自
煎向無適於所任始孰多於此焉

原本闕
二字

何止將就其

美苟成乎名奚惜違理幸承薦揚得奉恩光濡君口手
之澤冒君懷衷之芳不濫吹噓端含雅正堅外守節虛
中俟命有若建親事主適道蘆政樹以風聲達乎天聽
美其窮不易規管能有截柔指斜據丹脣上列引氣內

填流音外泄更微迭盛將聯復絕及乎和暢平施百志
熙熙拂怨爰作萬夫矍矍協宮商以節宣隨應變以牢
絡俾簫不獨舞鳳瑟不獨躍鱗嘯無以振木歌無以驚
塵諒飛動之咸運豈金石之足倫願罄能兮宅君之掌
握願度曲兮布君之禮樂儻不遺於賞筵願何辭於撲
斲

笛聲似龍吟賦

以聲之相類有
如此者爲韻

唐

闕名

笛爲樂兮人所吹噓龍爲神兮天泉是居何音聲之酷

似而性質之本疎想其形謂同婉若聆其響稍異翕如
始其伐斲厚地因材制器四孔有加五音具備無煩乎
鈞簧促柱有用於娛心滌志乍從容而寥亮究律呂以
精粹伊滿堂之咸驚疑在田之忽至淒清韻起方將樂
以忘憂想象雲生寔曰物從其類庶可以分於繁會諒
難測於同異徒察其含嚼奔放激濁揚清如泉水之或
躍疑御日以飛聲象乎鼉有逢逢之鼓疑乎鳳有嘒嘒
之聲雖學如不及莫之與京曷若高下自乎氣洪衰應

乎手曲引如變於雲霄霧雨若集其前後劉累聽之而
欲萎葉公聞之而反走非影響以因依實混合於妙有
東南之美厥狀蒼筤不因乎度土合木寧謝於玉質金
相調逸簫管之奏音含宮招之祥若降於天如聞於野
穆公簡子徒得其遊魂白雪陽春奚稱其和寡考終樂
以自然信斯笛之美者當適易持龍吟似之季長每悲
於洛客鄰人能感於子期入耳之初喜攀鱗之有所迴
眸之際覩截竹而在茲是知夫揮絃戛擊以洋洋轉喉

紆餘之靡靡夫神物之相應者無能及此

洞簫賦

漢王褒

原夫簫幹之所生兮於江南之丘墟洞條暢而罕節兮
標數紛以扶疎徒觀其旁山側兮則嶇嶔巋崎倚熾迤
嶓誠可悲乎其不安也彌望儻莽聯延曠盪又足樂乎
其敞闊也託身軀於后土兮經萬載而不遷吸至精之
滋熙兮稟蒼色之潤堅感陰陽之變化兮附性命乎皇
天翔風蕭蕭而逕其末兮迴江流川而漑其山揚素波

而揮連珠兮聲璫璫而澍淵朝露清泠而隕其側兮玉
液浸潤而承其根孤雌寡鵠娛優乎其下兮春禽羣嬉
翱翔乎其顛秋蛩不食抱撲而長吟兮玄猿悲嘯搜索
乎其間處幽隱而與屏兮密漠泊以徼緣惟詳察其素
體兮宜清靜而弗諠幸得謚爲洞簫兮蒙聖王之渥恩
可謂惠而不費兮因天性之自然於是般匠施巧夔妃
准法帶以象牙提其會合鏤鏤離灑絳脣錯雜鄰茵繚
糾羅鱗捷獵膠繖紋理比挹拊擲擲於是迺使夫性味之

宕冥生不覩天地之體勢聞於白黑之貌形憤伊鬱而
酷礧愍眸子之喪精寡所舒其思慮兮專發憤乎音聲
故吮吮值夫宮商兮和紛離其匹溢形矯旋以順吹兮
瞋唼唼以紆鬱氣旁迂以飛射兮馳散渙以逡律趣從
容其勿述兮驚合還以詭譎或混沌而潺湲兮獵若枚
折或漫衍而絡驛兮沛焉競溢恹慄密率掩以絕滅嚙
霰曄蹀跳然復出若迺徐聽其曲度兮廉察其賦歌歎
必嘯而將吟兮行鋌鋌以和囉風鴻洞而不絕兮優繞

嬈以婆娑翩繇連以牢落兮漂乍弃而爲他要復遮其
蹊徑兮與謳謠乎相繇故聽其巨音則周流汜濫并包
吐含若慈父之畜子也其妙聲則清靜厭應順敘卑述
若孝子之事父也科條譬類誠應義理澎湃慷慨一何
壯士優柔溫潤又似君子故其武聲則若雷霆較輶佚
豫以沸渭其仁聲則若凱風紛披容與而施惠或雜還
以聚歛兮或拔擢以奮棄悲愴怵以惻怛兮時恬淡以
綏肆被淋灑其靡靡兮時橫潰以陽遂哀悁悁之可懷

兮良醪醑而有味故貪饕者聽之而廉隅兮狼戾者聞之而不懟剛毅彊馱反仁恩兮嘽延逸豫戒其失鍾期牙曠悵然而愕立兮杞梁之妻不能爲其氣師襄嚴春不敢竄其巧兮浸淫叔子遠其類嚚頑朱均惕復慧兮桀跖鬻博儻以頓顙吹參差而入道德兮故永御而可貴時奏狡弄則彷徨翔翔或留而不行或行而不留憚悵瀾漫亡耦失疇薄索合沓罔象相求故知音者樂而悲之不知音者怪而偉之故爲悲聲則莫不愴然衆歎

擎涕收淚其奏歡娛則莫不憚漫行凱阿那腰膝者已
是以蟋蟀蚘蠖跂行喘息螻蛄蝻蠅蚋蠅翅遷延徙
迤魚瞰雞睨垂喙蛩轉瞪瞢忘食況感陰陽之和而化
風俗之倫哉亂曰狀若捷武超騰踰曳迅漂巧兮又似
流波泡洩汎捷趨蟻道兮哮呶呌喚躋躋連絕屈殄沲
兮攪搜濇捎逍遙踊躍若壞頽兮優游流離躊躇稽詣
亦足耽兮頽唐遂往長辭遠逝漂不還兮賴蒙聖化從
容中道樂不淫兮條暢洞達中節操兮終詩卒曲尚餘

音兮吟氣遺響聯絲漂撇生微風兮連延駱驛變無窮兮

洞簫賦

以四聲為韻

唐闕名

南國之紀兮江水深中截嶺兮天姥岑試一望兮見簫
笳之參差碧雲飄其正色白日出其重陰每含和以自
守雖歲寒其莫侵於是迺使夫匠人陵嶠森昧明幽宵
攀重蘿閱豐篠截成枝之龍質擬銜花之鳳鳥作為洞
簫其聲窈窕矇瞽之士純精所至尤澹澹兮無營浩紛

紛兮縱肆纖指敏手隨抑揚之虛滿曲折等分任吹噓
而懿淶爾其爲樂也則蘇維稽詣而逸其爲苦也則瀏
漂冽清而悴或嶢峴以相從復淋漓而遠被有若層山
抱空而晴燭巨海涵虛而夕涖是以君子聽之載其平
粹乃乎弄玉旣好簫史亦出登翠檻之巍峩結紅羅之
婉蔚揚葉鮮吹荷花浴日對吟空闊之情復感神仙之
術若乃漢皇未躍周勃護喪哀筵左引畫翬前張靈逵
迤而就挽思徘徊而永傷悽其吮吮誰非斷腸故若翔

若止心中定矣若反若墜不遺其類趣從容以向空乍
倚那以內闕信大雅之紆直繹茲聲之開塞匪天地兮
同和孰能與夫偕極

漢宮人誦洞簫賦

以清韻獨新宮
娥諷誦爲韻

唐

黃滔

王子淵兮誰與倫洞簫賦兮清且新麗藻上聞於天子
妍詞遍誦於宮人名價有茲寫札於御牋彤管風流無
比吟哦於貝齒朱脣斯賦也述江南之翠竹生彼雲谷

甘露朝灑瑞煙晴撲般斤遽取於貞勁夔律乃知其蘊
蓄既而植物惟一樂工惟獨九重聖主俄聆於玉韻金
聲兩掖佳人爭致於瑤編繡軸授受相從彤闈絳宮始
喧喧而歷覽旋一一以精通十二瓊樓不唱鸞歌於夜
月三千玉貌皆吟鳳藻於春風莫不魯殿慙魂巫山破
夢應教墨客以心死解得紅妝之口諷時時柱席驚飄
舞雪於羅衣往往蘭臺誤下歌塵於綺棟於時閑趙瑟
寢秦箏駐雲雨咽咸英非春而御苑花折當夏而幽閨

景清如燕人人卻以詞鋒而屬吻雕龍字字爰於禁署而飛聲泉噴香喉雲靡綠鬢豈貫珠之歌同調固如簧之言別韻遂使霞牕觸處不吟紈扇之詩樂府無人更重篴篥之引斯則琴賦與笛賦奚過才子獲才人詠歌體物之能有是屬詞之道如何一千餘字之珠璣不逢漢帝三十六宮之牙齒詎啓秦娥方今天鑒求文詞人畢用有才可應於妃后工賦足流於嬪從洞簫之作今何代無誰繼當時之吟誦

吹竹學鳳鳴賦

唐
梁洽

鳳惟應聖竹乃無情何截彼嶰谷之節而吹象朝陽之
聲音韻既生訝噤噤而成響宮商間起若鏗鏘以和鳴
昔黃帝揆日伶倫制律將分天地之氣以正陰陽之術
選碧鮮西域而非妙得厚均崑山而無匹既翦既伐玉
潤之姿是分以噓以吹金珠之聲斯出貫時之容未改
作瑞之思孔將呼吸兮斷而復續疾徐兮抑而更揚散
漫於叢篠之間疑郊藪已集飄流於芳林之際謂庭梧

來翔此音既舉彼德可序聞軫宮而引商若命儔而嘯
侶遂使審音之士睨孤管而生疑考祥之人向高岡而
延佇既而合黃鍾制大呂作候不乖於晷刻分時先報
於寒暑逸韻蕭寥德音孔昭聆五聲而既備知六氣而
能調儻吹於紫閣之前何異巢阿閣之日如發聲於青
山之上可繼鳴岐山之朝且鳳聲雖虛竹響有稟伊異
質之可用惟聖人而能審五聲並發疑九雛之互鳴衆
響難侔覺七音之異品今國家做不言而四時以遂法

無違而萬物如春竹兮任截鳳兮來馴至仁以調乎元
氣大信用洽乎生人由是律候以正其惟大聖亦何必
取鳳聲之竹然後測陰陽之令

參差賦

有序

明
王 寵

余聞王卿子美文子壽承皆善吹簫賦以贈之曰

彼江南兮紫管洞罕節兮條道混會合兮象牙爛朱脣
兮金鏤承公子兮光御發宮商兮清秋羌明月兮翔東
美要眇兮雲中攜佳人兮燕後宮臨曲池兮伏丹櫓吹

激楚兮順揚風霓裳飄飄兮鸞鳳若逢紛予去故而就
新兮四海焉窮蹇誰留兮中止忽婉孌兮聲靡眷寶結
兮同心矢偕老兮君子終嘽嘽兮縱所之朱顏倏忽兮
能不悲人生幾何兮朝露晞歡樂不常兮日月馳安得
千秋兮永若斯亂曰繁音促薄兮蕩人心罔象相求兮
窮高深神歸來兮勿周章彷徨四出兮恐弗勝聊逍遙
兮澹容與哀中則兮樂不淫

橫吹賦

有序

梁
江淹

驃騎公以劔卒十萬禦荆人於外郊鐵馬煩而人聳色
綵旄耀而士銜威軍容有橫吹僕感而爲之賦云

北陰之竹兮百尺而不見日石磴礧而成象山沓合而
爲一雲遙遙而孤去風時時而寒出木欽柯而攢抗草
騫葉而蕭瑟故左崎嶇右礧礧樹巖崿水泓澄鎮雄蛟
及雌虺颺獨鵠與單鷹白山顙赤山艷匝流沙經西極
原陸窈灌莽深人聲絕馬跡沉寂然四顧增歎累吟雖
欲止而不能禁此竹方可爲器迺出天下之英音於是

帶以珉色扣以瓊文潤如沉水華若浮雲赤綬紫駮星
含露分其聲也則鞅鬱有意摧萃不羣超遥衝山崎曲
抱津縣暴順序周流銜呂故西骨秦氣悲憾如慙北質
燕聲酸極無已斷絕百意繚繞萬情吟黃煙及白草泣
虜軍與漢兵於是海外之雲處處而秋色河中之鴈一
一而學飛素野黯以風暮金天赭以霜威衣袂動兮霧
入冠弓刀勁兮馬毛寒五方軍兮出不及雜色騎兮往
來還旃如雲兮幟如星山可動兮石可銘功一豎兮迹

不奪魂既英兮鬼亦靈奏此吹兮有曲和歌盡而淚續
重一命而若煙知半氣之如燭美人戀而嬋媛壯夫去
而躑躅故感魂傷情獲賞彌倍妙器奇製見貴歷代所
以韻起西國響流東都浮江繞泗歷楚傳吳故函夏以
爲寶飾京闕以爲戎儲至於貝冑象弭之威織文魚服
之容董山錫刀耶溪銅鋒皆陸斷犀象水斬蛟龍載雲
旂之逶迤扈屯騎之溶溶嗽寥亮於前衡嘒陸離於後
陣視盼眄而或近聽嘹嘈而遠震奏白登之二曲起關

山之一引吐哀也則瓊瑕失彩銜樂也則鉛堊生潤採
菱謝而自罷綠水慙而不進代能識此聲者長減淫而
何吝

鼓吹賦

晉 陸 機

原鼓吹之伊始蓋稟命於黃軒播威靈於茲樂亮聖器
而成大騁逸氣而憤壯繞煩手乎曲折舒飄颻以遐洞
卷徘徊其如結及其悲唱流音彷徨依違合歡嚼弄乍
數乍稀音躑躅於脣吻舌將舒而復迴鼓砰砰以輕投

簫嘈嘈而微吟詠悲翁之流思怨高臺之難臨顧穹谷
以含哀仰歸雲而落音節應氣以舒卷響隨風而浮沉
馬頓迹而增鳴士擗蹙而沾襟若乃巡郊澤戲野垌奏
君馬詠南城慘巫山之遐險歡芳樹之可榮

笳賦

魏
杜摯

惟葭蘆之爲物諒潔勁之自然託妙體於阿澤歷百代
而不遷於是秋節既至百物具成嚴霜告殺草木殞零
賓鳥鼓翼蟋蟀悲鳴羈旅之士感時用情乃命狄人操

笳揚清吹東角動南徵清羽發濁商起剛柔代用五音
迭進倭爾却轉忽焉前引或溫溫以和懌或悽悽以噍
殺或漂淫以輕浮或遲重以沉滯

笳賦

有序

晉
孫楚

頃還北館遇華髮人於潤水之濱向春風而吹長笳音
聲寥亮有感余情爰作斯賦

銜長葭以泛吹噉啾啾之哀聲奏胡馬之悲思詠北狄
之遐征順谷風以撫節飄逸響乎天庭爾乃調脣吻整

容止揚清臚隱皓齒徐疾從宜音引代起叩角動商鳴
羽發徵若夫廣陵散噉三節白紵太山長曲哀及梁父
似鴻鴈之將雛乃羣翔於河渚

夜聽箏賦

晉
夏侯湛

越鳥戀乎南枝胡馬懷夫朔風惟人情之有思迺否滯
而發中南閨兮拊掌北閨兮鳴箏鳴箏兮協節分唱兮
相和相和兮諧慘激暢兮清哀奏烽燧之初驚展從白
之歎乖伸棄兮更纏遷調兮故顏披涼州之妙操擗飛

龍之奇引垂幽蘭之游響來楚妃之絕歎放鴟雞之弄
音散白雪之清變

聞角賦

有序

元

劉詵

予久客城中朝暮聞角念歲月易徂有感而賦

孤城始秋涼月流夜懸葉鳴空疎螢入榭雲鱗鱗而不
風漢耿耿以西下鼓屢急而遄絕鐘漸遠而欲罷有聲
鳴噫非咽非咤節迭轉而愈長哀一送而如瀉於是劉
子喟然歎曰茲非羌人所以愁予焉者邪鼙極四立物

象兩數肇帝鴻之智創忽幾更於朝暮天沄沄而如輪
人擾擾以俱驚年逾年而遞新日復日以猶故春花泣
暝寒鳥棲露青山淡而無言去軌盈而成路蛾眉變而
垂霜華屋鬱以爲墓譬栖塵之寄轍倏東西而不悟嗟
此聲之何情送萬化以終古是以漢武欲求於飛仙秦
皇行樂而無度皆無可於奈何知不可爲而勿顧予欲
破形息聲蕩制除故使斯人無昕晦之懷忘陰陽之節
莽莽而行怡怡而寤可乎客有笑之曰子惟多感不求

其端夫規之以龍門之桐引之以淇水之竿飾藻繪之
徽異託奴隸之所刊此天地之委質曾何與於悲歡且
夫王孫公子抵掌歌嘯朝發五陵暮宿溫園靚妝吳嬌
嫵舞燕妙將軍勝敵行賞獻廟凱歌屢揚笳鼓迭奏前
營旗之太白後蹴鞠之要褭千石一飲萬金一笑豈不
動於所聞忽飄吹之驚竇乃有寧生未遇單練不完翁
子行歌樵路晚寒身辭家而靡適妻去室而不安東眺
臨淄西望秦關星月不動迢迢千山獨抱志其何爲乃

掩扉而長歎正則去國伯奇履霜擗花寒而不吐秋風
起兮吹霜天茫茫而正色鴈矯矯而高翔痛所天之未
遇獨忍死而徬徨又若陳后初絕班姬早衰春苔綠兮
生階曙月皎兮窺帷菱鑑無色蘭芳歇菲立長門之殘
雪睨建章之高枝撫長夜之如年哀往日之莫追此其
人聞之然後增歎填膺發恨銷骨流涕而不自持也是
茲聲之在宇宙特羈窮不遇憔悴失意者之所獨悲也
彼其鳴噫朝暮者其亦安知之邪是故感不在物而在

於心山陽聞笛東市泣琴聞胡笳而折骨掩琵琶而沾襟慨所聽之不同亦何怨於無情吾聞太上立德其次立功其次立言苟有託於悠久又安計於歲年睠天道之有常孰能係於運遷彼視蔭而嗟衰諒不取於聖賢於是客主釋然一笑而起庭月既半角聲乃止

嘯賦

晉
成公綏

逸羣公子體奇好異傲世忘榮絕棄人事晞高慕古長想遠思將登箕山以抗節浮滄海以游志於是延友生

集同好精性命之至機研道德之玄奧愍流俗之未悟
獨超然而先覺狹世路之阨僻仰天衢而高蹈邈跨俗
而遺身迺慷慨而長嘯於時曜靈俄景流光濛汜逍遙
攜手踟躕步趾發妙聲於丹脣激哀音於皓齒響抑揚
而潛轉氣衝鬱而燦起協黃宮於清角雜商羽於流徵
飄游雲於泰清集長風乎萬里曲既終而響絕遺餘玩
而未已良自然之至音非絲竹之所擬是故聲不假器
用不借物近取諸身役心御氣動脣有曲發口成音觸

類感物因歌隨吟大而不滄細而不沈清激切於竽笙
優潤和於瑟琴玄妙足以通神悟靈精微足以窮幽測
深收激楚之哀荒節北里之奢淫濟洪災於炎旱反亢
陽於重陰唱引萬變曲用無方和樂怡懌悲傷摧藏時
幽散而將絕中矯厲而慨慷徐婉約而優游紛繁驚而
激揚情既思而能反心雖哀而不傷總八音之至和固
極樂而無荒若迺登高臺以臨遠披文軒而騁望喟仰
抃而抗首嘈長引而慘亮或舒肆而自反或徘徊而復

放或冉弱而柔擾或澎湃而奔壯橫鬱鳴而滔洄列繚
眇而清昶逸氣奮涌續紛交錯列列颼揚啾啾響作奏
胡馬之長嘶迴寒風乎北朔又似鴻鴈之將雛羣鳴號
乎沙漠故能因形創聲隨事造曲應物無窮機發響速
怫鬱衝流參譚雲屬若離若合將絕復續飛廉鼓於幽
隧猛虎應於中谷南箕動於穹蒼清飈振乎喬木散滯
積而播揚蕩埃靄之溷濁變陰陽之至和移淫風之穢
俗若迺游崇岡陵景山臨巖側望流川坐盤石漱清泉

藉皋蘭之猗靡蔭修竹之嬋娟迺吟詠而發散聲駘驛
而響連舒蓄思之悱憤奮久結之纏緜心滌蕩而無累
志離俗而飄然若夫假象金革擬則陶匏衆聲繁奏若
笳若簫礪硠震隱訇磕礚發徵則隆冬熙蒸騁羽則
嚴霜夏凋動商則秋霖春降奏角則谷風鳴條音均不
恒曲無定制行而不流止而不滯隨口吻而發揚假芳
氣而遠逝音要妙而流響聲激曜而清厲信自然之極
麗羌殊尤而絕世越韶夏與咸池何徒取異乎鄭衛於

時繇駒結舌而喪精王豹杜口而失色虞公輟聲而止
歌甯子斂手而歎息鍾期棄琴而改聽尼父忘味而不
食百獸率舞而抃足鳳凰來儀而拊翼迺知長嘯之奇
妙蓋亦音聲之至極

擊甌樓賦

有序

唐張曙

宋玉九辯曰悼余生之不時也甲辰竄身巴南避許潰
師郡刺史甚歡接春一日登郡東樓下臨巴江饌酒簇
樂以相爲娛言間有馬處士末至善擊甌者請即清讌

爰騁妙絕處士審音以知聲余審樂以知化斯可以抑
揚淫放頓挫匏竹運動節奏出鬼入神太守請余賦之
余曰不圖爲樂之至於斯酒酣舐筆乃爲賦云

器之爲質兮白而貞水之爲性兮柔而清水投器而有
象器藉水而成聲始因心而度曲俄應手以徵情莫不
鼓蕭熠燿撇捩縱橫胡不自匏絲而起胡不從金石而
生孰爲節奏樂我生平何彼穠矣高樓燕喜叩寂含商
窮玄咀徵拂綺井以連騫送楓汀之靡迤巖隈有雪彪

咻而雕虎揚晴潭上無風捷獵而金虬跋尾目運心語
波迴浪旋似欲奮而還駐若將窮而復連得不似驚沙
叫鴈高柳鳴蟬董雙成青瑱鸞飢啄開珠網穆天子紅
韁馬解踏破瓊田睟眙衡盱神清調古旣嗟歎之不足
諒悲哀以爲主誓不向單于臺畔和塞禁胡笳定不入
宋玉筵中隨齊竽楚舞疾徐奮袂曲折縈組潺湲下隴
底之泉鳴咽上涔陽之櫓鶯隔溪而對語一浦花紅爰
裊樹以哀吟千山月午斯皆從有入無妙動玄樞濫貼

則水心雲母丁當則杖杪真珠於是發春卉駭靈姝羞
殺兮鈿爭金鐸愁聞兮鬼嘯神呼時也曲闕酒闌煙迷
霧隔覽放步以躑躅有餘聲而滴瀝臨流而欲去依依
轉首而相看脉脉太守曰遣止良辰好樂還淳諷賦已
勞於進牘謳歌爲序其芳塵余乃歌曰江風起兮江樓
春千里萬里兮愁殺人樓前芳草兮關山道江上孤帆
兮楊柳津是何況我兮擊拊眷我兮慙慙回首而漁翁
鼓枻凝眸而思婦霑巾夫當筵一曲人生一世何紛糅

乎是非顧何慕乎隆替飄縷宜入醉鄉來自識天人之際

擊甌賦

宋 梅堯臣

余觀今樂愛乎清越出金石之間所謂擊甌者本埏埴
異琳球入伶倫兮間齊優其可尚者鳴非瓦釜律度合
鼓非土缶音韻周和非埤簾上下應作非鐘磬節奏侔
而又冰質瑩然水聲儵然度曲冷然入耳瀏然猶有非
之者曰善則善矣未若豔女之歌喉何則是謂絲不如

竹竹不如肉以其近自然之氣況此曾何參於樂錄之
目乎余辨之曰融結合於造化堅白播於陶鈞發和於
器導和於人可以樂嘉賓可以暢百神安得絲竹謳吟
之匪倫也哉

聲賦

張德昇

夫禮樂相成人之有生物歸乎理感在乎聲聲之所起
其應多矣既聞鄭以戒荒亦稱韶於盡美至若詩陳鐘
鼓禮奏笙簧音懷律呂韻合宮商或嬋娟而如絕或窈

窈而復揚將曲盡而逾妙遇風吹而更長潛鱗競躍儀
鳳來翔嘉此聲之可貴樂吾君之奉常則有思婦傷離
芳年屢換纖素寒早清砧夜半埤鳴鶴而初合砌吟蛩
而正亂何此聲之可悲使空閨之浩歎況復金徽遠奏
玉律窮秋陰風烈烈邊樹脩脩聽胡笳之互動看隴水
之分流何此聲之可怨使征客之含愁亦有遯世無悶
閑居棲託坐嘯竹林忘形菌閣憐宿鳥之喧數愛飛泉
而噴壑何此聲之獨殊使幽人之爲樂夫意存則言發

言發則聲來順之則喜逆之則哀是以文君聽琴而悅
矣子期聞笛而悲哉何悲歎之易感使衆人之難裁客
有吟者潛然下淚吾將不言安知所謂退失路而流落
進無媒而自致思巫峽之猿啼聞洞庭之葉墜易曰同
聲相應同氣相求儻知音之見許期厚德而相酬

聲賦

宋
張詠

聲賦之作豈拘模限韻春雷秋蟲之爲事也蓋取諸聲
成之文王化之本苟有所補不媿空言爾賦曰

罔象迷冥大人忽生混沌初竅呀然震驚二儀吐形萬
靈吐英天機動制軋而爲聲故形有美惡焉聲有大小
焉伊物類之動作俟人事而克全至於大雷殷空萬竅
吼風不爲之隆品物磨臬羽足動發不爲之末未若人
聲與天通功與物長雄口吻之啓出於厥躬道機之張
騰凌鴻濛其所聞者羲黃唐虞繼踵而至宇宙隘其神
造化侔其智在聲之偉也得不得迴天而動地觀其得一
之發清清冷冷涼震洗瀛萬類聽之如懜而醒仁信之

發溶溶奕奕呼道振德萬類聽之如日破黑曰禮曰義
相迭而起鳴孝響悌駭心清耳萬類聽之如愁得喜廣
成五老聞而啓齒曰是何帝皇之聲也如此九道交訖
華夷和歌蠢動鼻息歡哈實多其在物也昭昭融融萬
緣和同萬籟響空答天之功其在人也萬心氣平萬口
宣騰雲門六英答君之聲故知五音八聲聲之枝歟金
石絲竹聲之器歟若本不正而聲不清何嘗動天地泣
鬼神而有諸三五迭生異業同聲唱古寡應吟今得精

儀事以之繁會時風爲之勁清作禮者有周旋之矩制
樂者有大武之名故聖人之音鏗如鏘金聖人之治潺
如流水加以商辛夏癸行無轍軌情慾沸空淫哇盈耳
民不知告政聲遂毀幽厲縱作心胡可度唱僻者輕脫
和僞者交錯鼓鉦之響日馳禮義之風日薄王道民政
潰然投壑攻乎亡國之音聚爲終身之樂秦怪一聲天
搖地坑烘赫火烈荒茫海傾阿房輦材枿臬山迴紫塞
築壘勾犇震雷鉗聖愚儒四海睽孤刮剝亡命痛腦連

脛於是民失其業怨口喋喋野薄其農荆榛颺風刑失
其矩民哀無所兵革填委死爲怨鬼故怨之爲氣也散
爲器塵積爲屯雲門鬱六合陽靈不曛怨之爲聲也烈
風相倚怒濤兼起鬼哭於郊神號於市川谷爲之闐擊
山巒以之崩圯陳吳一呼而宗社瓦毀天窮地終醜聲
不已洎於漢唐惟高與光太宗纘堯開元嗣皇智冠絕
古氣凌昊蒼倚天憑怒即動盪於八荒按劍大呼即交
映於中方借力者黎獻助聲者賢良亦不能廣仁義於

遞奏使道德之激揚掩商秦之餘韻系唐虞之聲芳者也未若我后凝神定思誠求理致與聖作則爲難於易惟禮是崇惟仁是嗜叩乎杳冥清靜以聽聞古謬惑皇心不平於是忠良是旌息嗟吁之聲不肖是黜息濫謬之聲均物惻隱息哀怨之聲厚施薄斂息流亡之聲四人是別息囂競之聲狴犴是理息冤枉之聲道德是守息兵革之聲人勞是恤息雕斲之聲小人是遠息邪佞之聲正音是奏息忘憊之聲奇哉壯矣堯嗟舜驚致章

獲之調下覺唐虞之頌輕浩浩蕩蕩無得而名異聲之
襲也揚溢昭灼上賢下愚既歡且譔鳥獸蹢躅蟲躍
躍信千載之一時與有生而同樂余欲引聲而作未知
何若

大音希聲賦

以希則能大物
理之常爲韻

唐

楊發

聲本無形感物而會生彼寂寞歸乎靜泰含藏於金石
之中緘默於肺腸之外喻春雷之不震時至則興比洪
鐘之未撞扣之斯大靜勝允合於人心玄同遠符於天

籟大道沖漠至音希微叩於寂而音遠求於躁而道違
三年之鳥不鳴驚人可異五絃之琴載絕知音蓋稀人
生而靜物本無機修以誠而上下交應臻其極而禽獸
咸歸遐想古風緬窮太始以彼聲音之道婉夫動靜之
理方歌擊壤堯人式貴於心和未夢鈞天趙簡尚勞於
傾耳鼓能興雨鍾亦候霜沖用可濟於道性善應方契
於天常興公之賦欲成已含金韻夫子之宮未壞猶闕
樂章無象無名不知不識守此虛淡終乎妙極豈逐物

而感通諒與時而消息損之而益潛運將契於天功聽之不聞玄化極符於常則幽玄之旨足以明徵海內於焉而自正天下無得以爭能由是廣可喻於人細可齊於物聲希者其響必大聲煩者其理斯屈常呼萬歲維嶽有時而降神將異三人點爾無心於鼓瑟理歸若訥事契寡詞既不言以足教必於聲而可遺存而不論馳神於六合之外語不如默籍口於三緘之時是各從其類也吾將一以貫之

響賦

以庭下雲晚
響輕爲韻

唐

張彥振

伊二儀之陶甄覽萬物之生長爲隨方而可見獨不測
乎茲響同夫道之無質每憑虛而起象既不覩其洪纖
亦罕知其尺丈爾乃依聲於發有待而生觸萬竅而皆
異會五音而共成隨人心之哀樂因感召而重輕至於
驚激萬變高卑千轉臨北谷而悲多因歸風而去遠感
華鐘於霜曙思孤鴈於秋晚觸物類以成態託空虛以
運形爾其細也草蟲鳴於潛穴至其大也震電作於天

庭離朱拭目而不見師曠清耳而可聽爾其響發乎器
必聲有假故器有盈虛而響爲高下隨之則不可究及
之如或可寫信造化之自然亦焉知其爲者乃有厭處
雞羣窮栖海濱垂六翮而未舉鳴九皋而不聞願託響
於星驥希可徹於高雲

御定歷代賦彙卷九十五

欽定四庫全書

集部

御定歷代賦彙卷九十六

詳校官檢討_臣劉炘

主事銜_臣徐以坤覆勘

總校官編修_臣王燕緒

校對官中書_臣潘曾起

謄錄監生_臣任楫文

欽定四庫全書

御定歷代賦彙卷九十六

王帛

玉賦

有序

晉

傅咸

易稱乾為玉玉之美與天合德其在玉藻仲尼論之備矣非復鄙文所可稱述

萬物資生玉稟其精體乾之剛配天之清故能珍嘉在昔實用罔極夫豈君子之是比蓋乃王度之所式其為

美也若此當其潛光荆野抱璞未理衆視之以爲石獨
見知於卞子曠千載以遐棄條一旦而見齒爲有國之
偉寶禮神祇於明祀豈連城之足云嘉遭遇乎知已知
已之不可遇譬河清之難俟既已若此惟亦泣血而刵
趾

玉賦

唐
仲之玄

眇坤珍之潛思察妙有之嘉生伊靈邱之產玉得天地
之純精超衆寶而惟美比君子而居貞含溫潤之麗色

抱清越之奇聲神光照廡高價連城瑜滅有私而不掩
珪美無心而自明爾乃太玄分儀洪纖是質瓊瑤琬琰
之殊號結綠懸黎之衆述五色相宣千名競出振鶴羽
以益鮮聳雞冠而增煥匪蒸粟之足侔何純漆之能亂
乃堅以守正妙以通微洪鑪不能易其色厚地不能瘞
其輝乍騰虹於白氣或見女以青衣山林孕之而含鬱
川瀆育之而漣漪昭靈神之景命啟聖哲之昌期無終
設漿而獲偶渭浦投釣而匡時復有逍遙人俗髣髴仙

府泛醴流膏崇臺結宇飛華崑閬之岫結影蓬瀛之浦
使人主齋戒班垂歎揚磨礪規矩華琬文章琢之為珪
下辨君臣之節合之為璧上連日月之光既展禮於天
地亦分榮於殿堂垂纓珮兮濟濟登鑾輅兮鏘鏘入管
絃而流韻備樽俎而含芳然而運有屈伸時兼否泰當
其潛影幽阻抱璞荒外砭砭紛糅砂礫無汰空泥涅而
不緇何風雲之難會嗟夫雖天下至寶必俟鑒而後知
苟非人而妄進則按劍以興疑故卞和為之漉泣鄒陽

為之銜悲夫物不可以銜賣將韞匱而藏之

受命寶賦

有序

受命寶在昔曰傳國璽自秦始皇有焉蓋取夫一世二世傳於無窮故有傳國之號歷兩漢至於陳隋隋煬之遇禍也字文化及盜之而西寶建德滅化及取焉易稱物不可以終否武德中太宗一戎衣而天下大定是器也與璽同歸國家用之以受命所承更名大寶而多歷年所自前代觀之受天明命則不求而得僭賊刦遷則

得之而失蓋神物之所在非徒然也抑又聞之鼎之輕重與璽之去留莫不視德之上下位之安否若恃寶命在已而惱心埋耳漸乎危殆以負宸之尊被竊鉄之言當此時也此片玉耳復何為哉竊讀史氏感興亡之器忿徽覬之類於是作受命寶賦若形制之小大厚薄則未始詳也故不備焉其辭曰

物之貴兮惟玉之英翕二氣以成形極百寶之純精卞氏得之三獻而後明當秦趙之抗衡挺高價於連城伊

玩好之所資微神器之鴻名及夫秦始皇削平六王
為龍為光追琢成章其文曰受命于天既壽永昌其始
也謂世有哲王傳國寶之無疆何逆天以暴物不及期
以降殃惟陰陽之運行終授受而不常隨素車與白馬
歸赤精於路旁逮夫漢業中微后族專命祿去公室世
移威柄實沙麓之遺瘵成巨君之篡害雖擲地以慷慨
終莫救夫顛沛俄漸臺之頽覆歷更始與赤眉咸庸懦
而不居卒亂長而禍滋洎四七之龍驤為火主以得之

遂祀漢以配天延二百之炎輝苟非其人寶命不歸悼
桓靈之不嗣置天下於阽危既而赤伏道喪黃星兆發
雲雷遘屯朝社播越去乘輿而漂蕩入智井以蕪沒披
草萊以拯之實功存乎武烈何典午之傾潰劉石盜以
自尊既江表之卜年遂歸明以去昏五世推移或亡或
存失得由道隋之并吞始負險以爭雄俄銜壁而來奔
惟大業之離阻由君昏而黷武豺狼呀以當路郊廟棄
而失主望夷之釁既發斯器淪於醜虜昊天有命眷我

高祖騫飛汾晉震疊闕輔雲行雨施雷動飈舉聖人既
作萬物斯覩於斯時也充德扇結束周琬琰帝謂文皇
陳師往伐如火烈烈如風發發牛口先撥虎牢則達致
四海於升平混車書以同轍惟神器之有在終告歸乎
魏闕考乎先王之統世也以文經天以武緯地觀象備
物從宜制器播而用之為天下利故曰大德曰生大寶
曰位位之升降唯道所至先王審其所以故為大於細
為難於易然後本不搖而末不墜安危之體鑒此而已

若夫符命之所加歷數之所歸莫不天人合發區宇樂
推休祥煥然靈命顯思是以有守有失動而悅隨苟貪
叨與僭亂莫不速禍而召危此玉也公路執持衆叛而
親離趙高引佩殿壞而身糜惟前軌之昭昭孰可幸捷
以取之若答曰吾皇有命如天有日傳寶在我昏庸自
佚則陸渾無問鼎之事歷代無奉璽之術苟思慮於廢
興故不既得而患失於戲天發禍機聖人定之天生神
物聖人用之唐哉皇哉大人造之子孫百代永言保之

鎮圭賦

以王者端拱四維
鎮寧為韻依次用

唐元稹

天子鎮圭十有二寸其長義在撫有十二州之域而為
億兆之王圭比德焉所以表特達之美鎮大名也有以
示彈壓之彊以之徵守則有土之臣至以之卹患則受
災之地康當宁無為於南面朝日有事於東方乃會百
辟而執之班五瑞於來者作山龍之端表我則清光皎
然雜蒲穀以成行爾乃鞠躬如也想夫彤闕乍曉碧砌
生寒當玉座而高居狀中峰之冠瑤岫透鑪煙而迴出

意秋月之壓雲端是以聖后矜持庶寮瞻重安八荒於
術內故捧必當心握萬務於掌中故大不盈拱映冕旒
則璿樞星綴間黼黻而瓊枝花擁豈獨使威儀可觀亦
以明社稷有奉美哉聖人之制器也靡不有類銳上以
象天方下而法地備采章以盡飾琢崇高而定位夫衆
色不可以雜施依方面之正者惟五羣山不可以咸寫
選域中之大者有四盡舉凡而得一故相傳而莫貳義
存敬慎道在底綏詳觀組紵足辨操持俾經制之不亂

若縑藉之相維况國家備物繼周垂衣體舜自天有命
非因桐葉而封唐提象握機故配土行而執鎮豈唯傳
歷代之瑞寶抑亦彰受命之符信也重曰圭銳也睿作
思而百志靈鎮安也安於道而萬物寧亦嘗三復斯名
矣所以表道德之維繫若此則君為道之本器乃道之
形苟能據於道而依於德亦可執無名之璞而逍遙乎
大庭

鎮圭賦

以王者端拱四維
鎮寧為韻依次用

唐
蔣防

天鎮四野君尊萬方取威重以馭物在東持而有章叶
和人神蓋先之於六瑞表正旒宸誠用之乎百王斯為
貴也寶之大者琢磨有耀溫潤無瑕天臨靜謐以我鎮
壓乎寰中帝德休明以我熠耀乎諸夏皓爾凝潔溫如
可觀蘊五德之符采寫四鎮之峰巒其色正其容端乃
直乃方象名山而守固不瑕不剝配王室以常安豈不
真姿有奉嘉名天寵遠以視其凝命近以彰其端拱大
而不瑑禮經匪尚其文華執之不回聖人無離其輕重

想夫始自良工成茲國器端乎掌握撫寧天地邦有六
瑞而圭列其初國有三山而象包其四穆穆之儀是佐
溫溫之德斯備所謂天子是毗邦國是維雲虹發色冰
雪成姿玉几臨朝承德音而有裕金門曉闢布寬政而
無私是知岱華恒衡之高自此而增峻琳琅琬琰之美
自此而發奇形抱素以呈妍聲含清而取振當照臨之
際曾不掩瑜在韜韞之時寧忘作鎮所以朝九有接萬
靈奇姿粲粲衆彩熒熒大禹成功垂芳於帝典吾君致

理酌憲於國經故曰觀一圭之質見四鎮之形觀一夫之政見萬國之寧儒臣賦鎮圭之事敢大揚於王庭

信圭賦

以分形立象於以保身為韻

唐張仲素

瑟彼信圭諸侯是執當大君之辨等與五玉而咸集皎以式孚堅如特立錫山川以為瑞在享獻而增襲將特比德以省躬豈獨退揚而進揖懿夫潔白其質縝密其文得儀形之是表叙羔鴈以成羣玷絕可磨不媿南容之復性惟特達每勞宣代之分則而效之惟其嘉矣觀

正直可以行化取毀方於焉克已至若左右佩珩淒鏘
宮徵寧同乎信以守之豈嗟乎不我屑以韋弦可譬琮
璧自殊乎尹旁達陽采外敷因追琢以為用諒小大之
合符韞以保焉匪沽諸善價省其人也宜賦以生芻此
乃邦之令典孰可已乎捧當心而措於掌足以見古人
之象稟溫潤而洞晶瑩於以彰文物之形色配彼蒼示
不言之信神如此鑒同明德之馨所以掌節是司藉之
乎縑與蒲穀而齊列冀邦家之永保比楚玉之無瑕晒

夏璜之有考或以圭為瑞或以象為珍傳命自同於符璽達情可接於君臣稽彼前典光輝日新念君子之作誠宜近取諸乎身

六瑞賦

以儉故能廣被
褐懷玉為韻

唐

李子卿

昔先王之朝列位也宴以示慈惠享以訓恭儉故六瑞之等差為百僚之形檢將以守官有序而亦在瑕無掩其質不昧特明乎等威其義則深兼管乎褒貶然而珪璧列布方圓為度煥彼憲章請徵其故且五節之制以

瑞為恒美王者有逮下之德而鎮圭是增庶存乎可大
可久仍契乎不騫不崩追琢斯成伊桓伊信會朝是執
惟股惟肱伯寘躬以式禮予揖穀以旌能況不闕一於
蒲璧固知夫六瑞之道斯弘若乃伯禹塗山千載攸仰
率土肆覲普天歸往獻替之道若木從繩朝宗之心猶
風召響棣棣之威儀是浹悃悃之德音克廣徵往會之
有倫信斯瑞之所獎洎夫道德浸微君臣失義或求車
棄禮或舉烽成偽出而非正為邱明所羞召之河陽則

文宣興刺九服自失其序四海莫由光被徒以彼翟為
好仇豈用我珪為嘉瑞丕休哉否不可終道窮斯達我
國家崇儀式禮敦本棄末三起衣荷再徵被褐執玉既
翼其左右班瑞仍霑於造闕美其四時展禮百神允懷
奉珪以拜亦授鎮之力孰云祈年而諧則知禮之所貴
莫先於玉發六瑞於周典冠二生於舜錄其難致也恥
應連城之價不易知焉甘朋三獻之足儻未逢至鑒之
所珍誰辨混沙以雌伏者哉

珪璋特達賦

唐楊諫

稽上古之貴德考先賢之立言偉珪璋之挺異同君子
之不諼是以先王之制斯器也不資於瑱珉而采之於
璵璠欲使執之者比德佩之者克念自然威儀式序而
有要有倫班秩以明而不濫不僭徒觀夫貂蟬巍峩以
耀彩組綬輝映以生文使夫閱信義堅貞以守職感瑕
瑜不掩以事君故能靖恭厥位克舉其勲豈不由珪璋
與賢哲相成其業曠千古而流芬則聖哲之創物也誠

有足而稱云原夫代人莫識荆山之裏藏精淪滓為寶
未用多歷年紀笑瓦礫之相和喜蘭蓀之狎士嗟乎道
不常屈終收卞子礪錯而真實自然拂拭而夜光特起
悲楚君之瞽昧曷砒砭之能似既而玉人攻治珪璋自
尊短長有制規矩攸存其聲清越其潤溫溫處掌握而
升玉砌隨佩服而列金門暉映增美炯然自持涵瑞日
之洞澈凜寒風之淒其然後知至寶之成器允夫天下
之不疑亦猶賢人君子遭遇惟時有強學懷書清規皎

如以不貪為寶思琢磨自居感珪璋之特達期哲人之
吹噓

石韞玉賦

以溫潤積中英
華發外為韻

唐

白行簡

高山穹崇山有石兮玉在其中物不能自珍繇千載而
抵飛鵲寶所以為異貫四時而見白虹積苔文而外翳
涵冰形而內融煥乎有文既自抱其堅白敦兮在璞將
有俟於磨礱嗟夫委質含章藏暉晦跡閔奇文於特達
韜善價於今昔棄他山之下未得輝乎滿堂泛渭水之

中誰復知其盈尺混清潤以潛穎託層崖而委積愛而不見雖類懷寶迷邦和而不同終辨我心匪石懿夫石惟鎮密玉乃堅貞孕明含粹養素挺英包其蒙詎覩蕊兮之色藏於密誰識訕然之聲徒觀夫明其內晦其外諒可久而可大見其素隱其華若去泰而去奢形委順而可轉心抱忠而無瑕闇然而彰同夫珠媚於水光而不耀異乎金在於沙爾其玉方蘊藏石未磨磷氣中潛以育德色旁達而示信處於鑿鑿則水折而方流依彼

巖巖亦山輝而未潤照廡之光尚戢截肪之色空存昧
識者但見其落落精鑒者方辨其溫溫石不能言莫遇
琢磨之力玉未成器難逢拂拭之恩則知至寶在乎藏
真至德惡夫自伐剗其心而白不受彩實其腹而間不
容髮客有愛此堅貞想其清越歎時俗之莫顧惜輝華
之潛發儻見采於一拳庶無虞於再刖

石韞玉賦

以淳粹積中英華發外為韻

唐李瑾

客有感物而憤激何彼連城之珍尚韞他山之石嗤宋

人之謬好嗟卞子之未覲抱昭質而陸沈緘異彩而塵
積則知時有興廢道有窮通以彼十德之美處斯一拳
之中光未施於照廡氣潛發於如虹知識真有希故處
幽自祕莫覩縝密空含精粹良工未遇曷溢目之可觀
高價儻來將無脛而自至其窮也類獨善以自守其出
也比兼濟而為利誠宜取貴於人資琢成器也今用晦
而明抱素含英慮以俱焚每懼崑岡之火俟乎入用自
憐物產之精豈直潤木有所輝山可名惜冲鑒之未臨

倦凡目之見忽徒在山而斯久獨蒙垢而未發麗質可
嘉采實損華居其中誰謂困乎石藏於密非曰匿其瑕
是知物變則通否極將泰彼含章而混跡由因中而表
外當今庶類歸真萬物化淳地不藏寶山將貢珍豈使
永韞光於散地獨埋照於窮塵願鑿石出於奇璞知乎
希代之無鄰

石韞玉賦

以清潤積中光
華外發為韻

唐

歐陽詹

荆山之石兮玉在其中和氏未遇兮追師不攻內抱貞

明蓄珪璋而自異外封磽确與礧礧而攸同紛爾千峯
塊然一石石居山而有類玉處胎而無跡昭彰奇彩象
鸞鏡之猶埋特達英姿狀蠙珠之未拆齊草木之偕賤
疊泥沙而共積瓌材則韞精氣時揚結白虹於林薄浮
清氣於巖岡多見已形空知六瑞之貴罕窮未朕誰分
十仞之光混瘞嵌巖沈蒙翳薈同夫有智懷其有以若
無侔彼不爭守厥屯而俟泰明其內晦其外將藏器以
待知不干物以招害原夫石則稱堅而可轉玉則受琢

而凝清日遇良工一則有順而無固時惟哲后一則無
脛而前呈我唐文武建元成康紹胤獲王母之玉琯致
淮夷之琛賁向華池而效色從溫樹以流潤伊抱璞之
未聞亦梯山之自進佳梁糅糝黃金在沙必簸糠而颺
礫冀取實以除華雕琢儻行輝章希發願同三獻之納
庶免再來之刖

韞玉求價賦

以韞匱藏諸沽
求善價為韻

唐
獨孤授

物有可為之感憤彼玉也則良寶而斯韞豈不以識貞

或寡至真難鬻白虹之氣莫通玄圃之英久伏精鑒頗期於卞氏無厭匪及於虞叔懷特達之性豈傷於山抱堅剛之姿寧毀於匱雪澤膏光陰中之陽工成六器色備五方是飾容乘乎車服亦將頌瑞於侯王表其華同貞士之素履韞於密叶至人之退藏誠異乎石處而以居可比夫處實而若虛我則物之貴者彼宜力以求諸惟賢有孚豈名是沽佩諸身可以節君之步執於手可以息君之趨或稱之以琬琰或嘉之以瑾瑜韞匱如將

於慢藏匪瑕之匿連城儻用之善價何脛之無是知接
神祇者必我之由奉朝聘者亦我之求雖含光之未發
信入用而則周伊入用也理均乎兼濟其含光也義等
乎獨善詎若韞鄭鼠之足啖寧燕石而莫辨有客感而
歎曰玉也者固可取貴乎天下今不售於人猶獨高其
價垂大賢之盛德非小禮之能捨故有偃蹇當時沈冥
委化必使反荆王之深感審田文之見詐則美玉器而
髦士官豈徒埋身而照夜

沽美玉賦

以懷寶迷時豈
曰君子為韻

唐

白行簡

美矣哉有玉於茲不磷不緇韜而藏則傷乎祕寶懷而
匿又慮乎失時是以露瑤華之炯爾就朝市而沽之且
以辨玉璞之名且以見至珍之道耀盈尺之燦燦彰含
拱之皓皓使思之者覩於貞清仰之者知乎堅好首六
瑞以為瑞排衆寶而稱寶然後厥聲載路厥價載聞蘊
十德以光代先駟馬以薦君亦何必隱映其華韜藏其
美行於魯謂迷邦之士入於宋比越鄉之予豈獨用為

薦神亦自以為厲已且時見玉而既重玉待時而以諧
獻楚之忠誠必賞求秦之價直非乖自可覆之於匱鬻
之於懷間彼琅玕照追師之筭離於衣褐裨天子之階
寧令善價不再良辰無幾且遠於簪裾永踈於筐篚夫
然則玉工貽誚君子不韙韞藏之則爾能求沽之則吾
豈如垂棘之璧不琢之珪亦當出彼巖石鬻此規攜是
以百爾之行一與之齊未有玉逢價而更惜士於時而
自迷然則事有可而必行辭有為而焉說道既危而思

隱善求顧而無伐故沽玉者遵於賜言待價者存乎子
曰沽哉於斯文而蓋闕

良玉出匱賦

以藏輝久矣善
價今來為韻

唐
嚴楚封

美玉於斯兮韞匱未揚閱其質韞其光寧處幽而遂久
將發蒙之可望貞必俟時奚甘其隱伏寶實稀代安得
而蓋藏勿謂愛之而不見願使闇然而後彰比事詎同
乎剖蚌契已可侔乎釣璜其始也不琢而成效珍可喜
絢彩旁射寒煙溢起辭礦璞而山輝乍無受緘滕而虹

氣未已同被褐之內朗類守墨之中美君方固局鑄彼
孰得而沽諸君儻力提攜必同茲而出矣於是至寶將
啟良工肯來目力深昧心源獨裁念孤貞之特達聊徙
倚以徘徊將發蒙之是思玉不得不發苟開物以為務
匱不得不開既而真質騰精孤光盈手貞非受采明不
容垢希成器而入用因比德而見厚荷拂拭於惟新忘
沈淪之永久溫其朗潤動有清輝知照廡而識之者異
將抵鵲而用之者非用如之何規模之下為環而循理

不盡製佩而流韻相借在昔退藏於密何敢稱珍幸今
顧盼生光終希善價乃知良玉之比也重出匱之義也
深雖寓言於彼而察人在今欲使出處有節貞方其心
無毀匱之嗟誠非肆志起生芻之詠寧懼陸沈則有報
匪瓊玖器慚瑚璉儻雕琢之見嘉庶英華之獨善

良玉不琢賦

以姿質溫潤無
假雕刻為韻

唐

崔咸

惟玉也稟堅白惟琢也散貞姿璞且無瑕可重其良者
德斯有比不在於文之故以素為貴也任其自然之資

則追琢其章不得以曲肆其巧特達之節不得以無飾
而疑懿夫蓄溫潤以生輝見精神於照室發虹氣彰皓
質欲磨不可每清貞以自持其美孔嘉在切磋而何必
體乎智而其理以密合乎仁而其色斯溫既有求於剖
璞寧不憚於焚毘諒成器之罔念固全真之可敦嗤獻
斗員來終見碎於亞父鄙成環可佩俾獲罪於叔孫含
其章積其潤恥從飾以變質豈匿瑕而為吝將奪價於
連城笑如泥於利刃所寶者道不在其沽幸可貴於君

予非賈害於匹夫流水之文記其方兮斯有他山之錯
施其用兮則無美可同於韞匱嫌匪生於掩瑜秉不磷
不緇之道陋為珪為璧之徒則知玉之美者是吾寶也
異宋人越鄉之患司城安得而使攻類晉侯外府之珍
虞道固知而可假雖天子賜珪於朝亦琢亦雕諸侯受
瑞於國亦磨亦刻所以尚其名尊其德豈徒文被褐之
懷飾截肪之色又有一拳可尚三獻未識俟覽者而求
旃冀善價而不忒

良玉比君子賦

以精光茲色矩
絕寶國為韻

唐

暢 瓘

白虹為氣太陽為精堅其質孕其明卞子識之而曰至
寶他山之石攻而挺英融雪華於潛潤洞冰彩而凝清
彼其良玉焜焜煌煌瑩若既兼縝密燦乎其有文章積
千金而比價掩十城以騰光將以配君子比皇王豈徒
潤林薄蘊巒岡而已哉伊何配之溫潤含茲瑕穢不匿
貞心固持性自然也灼而不變質有餘也涅而不緇溫
以作德成我邦式天子展四時之儀庶官修五等之職

珪以為瑞佩以比德上下有軌尊卑有翼既山水節其
文玄蒼差其色四者爰備勞逸是主民也事也右叶於
角徵君也物也左諧於宮羽反而規旋而矩其志不散
其容斯取況居則設朝則結進退鏘鳴抑揚罄折禮樂
之儀著非僻之心絕是則維身允固惟玉不撤且駭雞
之珍驪龍之寶雖絕其豔煥其藻但侈於庶心何補於
王道豈若玉之義也深乎博乎詩人以生芻取喻賢則
高矣孔氏以佩環讓德謙莫比夫故藏之瑞府偶之河

圖奉之者生敬執之者不趨幸無棄於照廡得一獻而
論都

青玉案賦

以報之貞亮因
物瑩心為韻

唐
張餘慶

當羣物之具陳唯玉案而是珍青瑩自乎天產追琢資
於匠人呈形而色有溫潤成器而道無緇磷由是功倍
几杖質殊琳珉當施設之不倦幸發揮而有因顧瞻之
時愛苔色之增麗拂拭之後覺花文之轉新振彼高價
膺茲美名潔其內而冰徹虛其中而砥平嘉韞積之資

忽雕鐫而有立以出藍之色作治瑩而斯成美乎克玩
好守堅貞小大合度高卑有程諒當人而可託信在物
之惟精厠彼華筵雲母之屏邊色麗置乎虛室瑠璃之
牕下寒生玉貌宜臨丹心可瑩成其高而有足歷其遠
而有脛將以表青骨傳素心既捧執以來此亦保持而
在今甘寢之時虛色而空憐角枕閒居之處凝光而但
對瑤琴是宜君子之好用資端操質美而微瑕莫容色
淨而纖埃不到况能坦蕩而為物以俟依憑而寄傲伊

錦繡之段誠可見投此瓊玖之珍是宜相報平居之時
中心甚夷當卓爾而空承簡牘忽藏諸而遂映簾帷見
賢之眼惟永日而觀矣比德之心可終朝而用之則知
瑰麗之狀物無以尚欲隨時而共美因體物而先唱空
附識真之人將一鑒其瀏亮

玉斗賦

以他山之玉琢
成寶器為韻

唐敬括

玉以至寶見珍斗以至平為器聚圭合而成量瑩瑜瑕
以表義蘊石而山谷增輝握樞而春秋定位祕以重璞

攻以他山中虛有待旁達無間內倍殊壁外圓若環用
之則稱物平施運之則含照自開燕石既分楚圭未剝
平準獻度良工就琢刻則為璋合而成穀口應吐納柄
隨把握有異擊刀漢營進綴趙幄議其遠邇曾是悠邈
特達垂名切磋有成炯光月皎洞徹冰清揣摩律度比
較權衡法帝車之杓如軒如輶校嘉量之趾不縮不盈
至若劉項爭帝龍蛇起陸楚塞瞻烏秦原逐鹿羽輕灞
上之敵漢厄鴻門之酷亞夫按劍張良獻玉雖碎斗以

稜威終拔山而取辱比德者何邀功則多佩服惟允關
石用和既執契而不遠諒求仁而靡他爾以至公秉彝
我以不貪為寶扣之則清越流響祕之則含弘守道光
照廡以如虹價連城而無考豈徒玉卮無當冰壺見杲
而已是以在天成象在物可師立身而溫潤無匹應用
而盈虛有時嘗為國器藏諸有司若暴新之所執吾何
以則而象之

攻玉賦

以他山之
石為韻

唐
趙 昂

有美玉於斯有工人在茲玉待人而成器人舍玉而何之於是施其巧審其思事必堅決心無墜虧再視再度以蒙夫精鑒匪瑕匪劇寧有於吾欺向無質直之性琬琰之姿特達人許清貞自持則大匠不顧天材或遺亦何知人之於火也不變其色投之於泥也不染其緇維彼良工見此多惜直以為珽圓而作璧無枉纖毫皆知所適遇今晨之發彩冀入珪璋察往日之屈蒙期分玉石於是虹氣干白雞冠與赤執之以禮故有藉而見文

受之必齊非許城而不易若然者玉隱於石玉無憚於
可磨玄黃糅色山水騰波但因時而獲賞敢輕議乎其
他人未我知甘無言於見棄賢能相達將不索而謂何
況乎玉之寡珉之多夫子有比德之歎卞生為追怨之
歌曰昔之玉在石石在山山有玉兮隱其間今則石為
錯玉為環環亦獻兮君解顏遂與生芻為比與郗桂同
攀豈辛勤於道路徒抱泣於荆蠻

被褐懷玉賦

以君子藏器
待時為韻

唐王起

王者貴而絕倫褐者賤而無文何祕質之用晦空冥懷而不分蓋以潛錯落蓄氛氲善價斯待韞光莫聞詎見識於和氏而包羞乎楚君當其組織初成彌縫已備焉褐同色牛衣齊類徒觀代藍縷配顯顙為卒歲之資有禦寒之利殊不知雪影斯積冰光所萃溫潤潛穎特達藏器自同韞匱之深莫發連城之貴青蠅欲點礙羽翼而却還白虹始騰隔領袖而猶祕是知玉人獲也用之而彰褐父得也舍之則藏外不婁而不曳中如璧而如

璋隨於人誰謂無脛映於體乍若凝肪自有同夫蘊石
亦何虞於越鄉我亦思古人展矣君子既效此而比德
亦念茲而行已固將匿彩於圭瓚合音於宮徵懼秦趙
之奪我則掩荆山之輝恥虞虢之爭我則藏垂棘之美
宜乎琢磨是賴清貞勿改映胷襟而發光雜山水而騰
彩成器而服之無斲開衽而沾諸有待信可以價奪衆
珍名高四海然後被其惡衣懷以待時有老氏之誠無
司城之辭苟釋褐之茲始當獻玉而無疑

以玉抵鵲賦

唐張環

夫何荆山之崔嵬而美玉之在哉匪精輝於朗璞浮煙潤於崇隈連壤石以熠熠雜冰霰之皚皚未登光於瑞府畏委質於瑤臺嗟野人之屢獻而楚王之猶猜此昭昭焉曾不識寶之為寶彼默默者焉知乎才與不才於戲亂玉者珉奪朱者紫以斯為賤亦孔之恥含白虹而靡察偶烏鵲而爰抵徒嬉戲以起予非特達而知已向使早遇鄭客先逢罕氏則必待價而沽命工而理剖以

為寶有珪璋之秉焉握而為珍胡瓦礫之投矣然後式
我王度比於君子其故何哉用之而已類傳版築以滅
跡呂垂緡而退趾忽殷帝以賚予復周王之至爾由匹
夫以登良弼自孤叟而參多士豈非貴本於賤泰更於
否觀彼玉之屈伸實伊人之行止則玉累形者璞人厄
才者命投沙有去國之賢懷寶為問津之聖苟或秉此
受蹇雖異物而同病然而人韜素德我獨文行用晦可
以為明以蒙可為養正將有待於潛隱夫何取於奔競

始用仰衣冠之駿德美銓藻之鴻柄清鑒雲披虛懷冰
映大拾遺寶高懸明鏡典我權衡於斯為盛別有被褐
蘊真而立伊投人之或誤乃按劍而適及昔同六鷁過
宋都而退飛今隨乘鴈赴陸海而遙集振羽翰而有待
搏扶搖而高戢慚巧媚以為容恥空言而取級是宜不
迨敢當玄圃之中玷則可磨希復白圭之什儻或傾五
都以置珍獻萬乘而為執則玉乎玉乎無復向時之泣

白環賦

唐
杜 顏

羣玉之山兮居帝臺之列仙采瓊華兮永久事雕琢兮
窮年青熒若水白氣如天剖以崑山之石洗以瑤池之
泉弄影長嘯薰風颺然知東夏有德而虞舜之賢受穆
清以出震服中和以御乾乃馳縞鹿與使者奉白環而
獻焉玉華溫潤玉理精堅英光千以旁達肉好一以虛
圓鼎鼎霜皎田田月懸分清輝於綺殿失皓質於瓊筵
賞三朝之盛禮恒五玉而來覲彼昭華之珍兮焉往延
喜之珪兮誰錫亦所謂歸有虞之理功告大禹之成績

美矣哉撫運今天寶至大素皓兮聖人之瑞非天則莫
之與非聖則莫之致琬無芒而未匹璧有美而奚類以
和柔剛以配忠義亂曰白羽之白輕只白雪之白消矣
未若茲環之有用縝如栗而未已至德竭而閔質帝道
亨而薦祉豈我隨時幹運與物終始茲大政兮揚大德
使吾君佩兮千萬祀

黃雀報白環賦

以靈禽感德報
以白環為韻

唐

張仲素

徵晦明於異域聞庶類之酬德彼黃雀之罹害遇青衿

而見惻有纖微之陋體無彩翠之奇色投林苦鷓鴣之
患墜地逢螻蟻之食情懷舊匹尚有啁噍之音自戀故
枝難舉翩翩之翼感之奚止曰楊氏子取於步武之內
寘彼巾箱之裏全而有之焉知所以洎養羽之再就方
銜恩而決起黃花受哺寧同食堪之懷白璧來酬用記
封公之祉言徵其事載赫厥靈表齊諧之異志合漢史
之祥經俟去之時既入羣而多類重來之夕方詭狀以
呈形稱仙使而報德何倖喜之可稱質乍隱於恍忽環

既受而晶瑩且賁然之好瑞以神告其潔白而就封諒
生成之是報想夫初飛葉際忽墜花陰空城路遠穿屋
譏深化未及於遙海聲似愁於北林焉知鴻鵠之秉志
實賴兒童之有心是知好生自中神貺玄格贈祥符之
數四勝兼金之累百晶晶月圓規規霜白溫其之色且
異隨侯之珍皎若之形自類有虞之獲嗟夫靈異之跡
出於無間或鵲緘玉印或樹蘊金環曾未若稚子懷仁
祥禽致感彼君子之出處實濟物於述坎環兮四代五

公垂竹帛之可覽

握中有玄璧賦

以希代之珍出於掌握為韻

唐

李為

璧為至寶握以藏輝與似月之色異俾如虹之氣微斂
外之容豈曰寘予於暗玄中之理尚乎知我者希故其
性比內融跡同反照拱形若將乎力素點影似因乎墨
妙見心之後任欲蓋而彌彰窺指之間縱有光而不耀
退雖於密德亦不孤方期發色於斯矣豈務掩瑕而已
乎初疑捧匣將投尚韞如漆或若橫肱未抵已怪得烏

懿夫藏點點而獨青映纖纖而有象或微疑其手澤竟空勞於目想同錫玄之後不暫去身驗守黑而居則先指掌不然何以久而不磷蔽而惟新雖未能如雪亦足以賤珉既剖乎石幸依乎人似乎中而隱影若居外以藩身攬之為盈手之玩出也為連城之珍圓而琢之而能全璞溫而執之何以不濯雖默默而沈潛每熒熒乎把握始同乎懷而被褐恐久而袖化為緇雖存已之雕鏤實賴君以保持言揚者或是色取者猶疑苟能執而

無失豈得棄之如遺深潛越石之拳明則誠矣固望荆山之目默而識之斯蓋見美一時同珍百代諒闕兮懷寶多斯兮若昧幽矣握中之璧實清流而可愛

庾氏子碎玉賦

以聖人捐寶以息爭端為韻

唐

韋 充

人無善惡利乃交爭故懲忿者無如於立義感物者必在於推誠所以庾氏子能捐片璧遂息兩情誠聖人之闡域見智士之縱橫當其愛惡所逼長短相賊意各是非事難姑息乃曰碎我此寶成君之德苟可易心固無

難色傍窺利害遂生一決之心下視錐刀不顧千金之
直於是置諸厚地投此攻堅隨形驕若應手琤然萬點
星分善價之心俱死二疑冰釋力爭之意都捐斯乃大
讓所加連城非寶棄此十德欲求諸道不然安得勵不
貪之志在彼斯須堅必斷之謀於予懷抱卓哉奇士克
已喻人解紛以道出義於身故得割所愛成乃仁不以
利為用而以德為鄰況乎雪彩飛揚霜華奔迸拆裂無
幾堅貞失性如散天之氣忽若斷虹碎含璧之圓皆如

破鏡此既棄寶彼焉息競則當路者誠可以稽疑立教者固宜於希聖彼機忘於絕絃難解於弄丸亞父碎斗而增恚海客鍛珠而成難徒生一理未息兩端曷若格物於恥勸人為美究其道不徒然想其心非率爾誠哉莊生之說吾固知其有以

蘭相如秦庭返璧賦

以題為韻

唐

李為

有和氏兮曠代之珍有蘭生兮非常之人全重寶以藩趙在輕生以抗秦既獲我心信卓哉於千古不辱君命

能使乎於四鄰相如於是詠東山之詩考西郊之役巾
車脂轄匪朝伊夕徘徊悵望沈吟感激誓殺身而報主
欲張膽而吞敵蹈虎尾而若閒過鯨口而無惕期一言
以復命得連城而致璧苟大信之或虧豈微躬之是惜
授使遄征不遑底寧望紫氣之函谷出黃沙之井陘既
臻天府之地遂造雲龍之庭秦君方臨丹陛按青萍耀
國華振朝經建翠鳳之旗則天收光景伐靈鼉之鼓若
地出雷霆然後命謁者先告令使者後進將恃威以逞

暴欲愛寶而損信曷英勇而知機弗詭詞以恭順溫如
之質既美嶷然之姿乃振且勅敵之見欺將殺身而不
怙西鄰之言是責南山之節斯峻何大國之無良為匹
夫之取俊不然者何以遭賈傳之過秦為相如之慕蘭
連城棄諸良玉歸歟且告秦言已矣復為趙寶焉如潔
誠求之何晚被褐懷之已遠生芻之質空存白虹之氣
不返

蘭相如金璧賦

以智勇雙高功
名永著為韻

唐

獨孤授

昔日趙氏且衰為暴秦所易徒稱割城以求壁然必背約而棄義將受其禍敢圖其利安定存乎變通得失繫乎愚智籌量未決君臣大恐賴繆子之薦賢得藺生之餘勇語之不忤觀者咸悚庶將城入而壁留焉使趙輕而秦重夫其壯節惟一至寶無雙奉草芥之使至虎狼之邦於是秦王自以強可臨弱志揚氣高謂我匹夫不難以制謂壁無足尚安得逃方坐章臺之中列萬乘之雄羣臣陪位使者趨風因發檢以求壁燭實氣於如虹

陳結觀而表裏浮光爛兮鏡吐潤色皎以冰空語未及
於前約寶方傳於後宮果無有償城之意欲坐收穫壁
之功藺君乃探物揣情沈機內萌譎指瑕以復取遂立
言而未平攄壯心而激發抗英辯以縱橫怒髮竿聳瞋
目電驚且使辱命將焉用生請以臣之頭壁俱碎君之
軒楹我合詭以全變彼示詐而望誠九賓之禮徒設間
道之使已行義必付於知己色無懼於就烹卒能成兩
國之勝負駭千古之威名然則寶也且所據神異取之

不可以僥倖幾星碎以棄秦庭終月圓而還趙境復得
曜叢臺之瑰麗增昴宿之輝影於物也善價斯存於國
也懿圖惟永是知興衰之大畧社稷之遠慮必假賢豪
用能輔助何全璧之事立亦全國之功著誠乎得士且
昌惟其善馭

澹臺滅明斬龍毀璧賦

以璧惡苟求人
難力制為韻

唐

白行簡

璧之為寶也至珍龍之為物也至神蘊彼堅貞由是見

希於代神其變化胡可不畏於人苟以力奪我寶則必
害及爾身原夫被褐而來艤舟以濟懷白璧為利涉佩
青蛇而自衛光連曉日若明鏡之高懸影落深潭狀白
虹之初霽孤櫂纔移於渡口二龍歛見於波際將至寶
因此可求謂匹夫於焉易制徒觀其迅雷鏗鉤狂電翕
輒轉清輝而陽景滅曜噴風雨而晴空變色拖尾乃無
所遁逃矯首則方將薦食朱萍焉能施其術攸飛莫得
用其力滅明乃挺利劍整扁舟驅天吳叱陽侯壯志奮

而髮植冠聳瞋目張而背裂血流白刃下耀於淵室紫
氣上衝於斗牛左絕其脰右舂其喉擢錦繡之鱗觸驚
波而乍聚乍散灑玄黃之血隨奔流而或沈或浮既風
恬而雨絕俄霧廓而煙收龍寶最靈孰可以威而聳壁
惟重寶豈得不義而求既而弭波瀾濟江干壁非人願
保全而莫可人非劍思耀武而誠難然後韞神邱即長
路持拱壁而歎息盼中流而回顧豈不以懷寶者為物
所求恃力者為人所惡且龍寶恃力人惟懷壁爾實我

欺我非爾惜雖在時之攸重諒於人而何益聞老氏之
誠莫守乎滿堂考聖人之清不貴乎盈尺遂投之河而
神罔敢受毀於岸而人莫敢有紛然電散謂齊后之碎
連環驕爾星分同亞父之撞玉斗則知動不可妄求不
可苟始則將害於人終乃自貽伊咎胡不伏水府而藏
珠於頷照崑山而銜耀於口故貪而斃也誠惟有悔之
凶毀以棄之安能無脛而走嗟乎仁必有勇信千古而
不朽

太公璜賦

元 楊維禎

客有浮乎東海之疆渭水之陽考申呂之封裔兮見大
風之泱泱夫惟老漁之人兮蹇齟齬而番髮逝辟地於
危邦兮紛獨守此矯節歲月不我與兮哀朕時之不當
彼神魚之出水兮孰從孕夫瑞璜自夏后氏之名珍兮
實取形於半璧曰大國之是錫兮非夫人之苟得何直
鉤之寓意兮迺珍物之見貽具神工之成刻兮知剖劖
之莫施曰姬受命兮呂佐之功之成兮報在齊惟良弼

之間生今天固有所賚也韜吾珍而不耀兮時固有所待也五百祀之膺會兮龍雲而虎風尚父之望兮望吾先公元龜示兆兮非羆非熊傾一見於大駝兮神合而道同躋後載而西歸兮登師臣於三事爾無覲色兮我無貳志人無間言兮總百寮於極位錫公袞之被服兮解朝歌之鼓刀邁洗耳之廢義兮配審象之神交貨通九府兮兵衍六韜一戎定治兮鷹揚牧郊自師文而傳武兮洎幼冲之左翼勒景襄之殊勲兮銘昆吾之偉績

首營邱之報功兮兼五侯之封域信神物之開先兮協
著蔡而罔忒嗟神魚之久化兮吾固莫質其是非吾獨
悲夫符命之興兮襲劉秀之偽辭識梁而夢鄧兮紛卜
鬼而稽疑彼夢臧之曠議兮又恍惘其奚知雖其神道
之託兮不既治道之賊也吾固知評璜刻九字之書兮
不若佩尚父丹書二十字之刻也諱曰蒼姬受命兮呂
佐生玉璜示兆兮吾何憑取人以身兮聖有經放勳示
法兮揚仄陋而明明

荆山璞賦

元范琮

繫荆山之蜿蜒而特起兮奠南服之名州鬱至和之輪
囷兮鍾美璞於巖幽洞乎尹之旁射兮光陸離之曄曄
外雖質而中則富兮豈砮砮之同類發奇祥於道側兮
何良玉之久湮苟獲用於瑚璉兮亦斯璞之稱情爰見
遇於和氏兮涕淋浪而悼茲曰昔至寶之不沒兮今何
困於塗泥迺三沐而三薰兮暨什襲以珍藏彼燕石而
猶或偶兮人何易此以為常遂齋沐以上獻兮冀君王

之見知何玉人之匪識兮咸或謂此為瓦礫之資紛招
尤而獲罪兮重茲玉之不幸乃捐淚而長撫兮抱終古
之深恨豈爾質之匪良兮嗟予命之弗時琨珷進而硤
石用兮反謂爾以為玼差吉日以再獻兮庶或伸於一
遇苟愚心之信修兮雖三刖其亦何顧懷茲玉以長邁
兮乃復叩乎君之門吾固知銜玉求售之匪正兮將竭
忠而欲言儻茲玉之足徵兮庶臣心之為泰也苟一獻
而遽舍兮予不忍為此態也竊獨感此厥故兮豈會遇

之有期信昭質之未虧兮夫何懼而自悲彼魚目之混
真兮嗟莫察其非是暨夜光之載照兮人孰不以此為
貴嗟余生之未晚兮方佩玉以夷猶儻獲知於夫子兮
亦斯璞之是投少歌曰峩峩荆山莫南服兮輝輝良璞
光煜煜兮人不爾知爾無自傷兮吾將偕子朝明光兮

荊山璞賦

元
謝一魯

吾嘗挾秋空之飛仙夜躋太華之危巔闔牛斗之消息
覩神光之煜然白氣殊虎丘之金精紅光異古獄之龍

泉溫其瑞靄之明潤無乃荆山竒璞之寶煙乎是山也
派分南北之條脈界龍門之河似太行之演迤媿王屋
之嵯峨北揖翠於賀蘭西鑒白於蓬婆鍾玄黃之磅礴
萃陰陽之至和孕粹質於山骨晦美材於崑阿狀假色
於蠟丸紋布爪於仙娥斥抵鵲之輕議陋種石之傳訛
也方其深韜神彩匪銜精瑛土不泉而澤潤木不春而
敷榮抱雕琢之全器養天真之混成不求知於隋卞價
默重於連城保厥美以待聘類有道之儀形及至王命

徵材哲匠搜奇罄崑岡之異產撫藍水而無遺乃窮其
幽乃陟其危忽至珍之神遇爛光華之陸離威暴羸其
莫攘資萬鎰其焉輸付良工而制器甘磨礪之靡辭湛
秋水之無痕瑩春冰之不疵十襲珍上方之璽五瑞輯
邦國之圭亦比德於君子鏘環珮其相隨按步趨之節
奏則肆夏而中采齊若乃瑚璉璋璣之器蒼璧黃琮之
類或飾朝覲之盛儀或潔郊社之明祀華治世之文物
擅廟廊之至貴於是琅玕厚顏玫瑰懷媿夜光明月南

金火齊皆立下風而不可與並議也嗚呼物以質美而見珍士以材德而登崇想荆衡之育秀實楚玉之攸鍾咸韞匱而需時豈抱泣於途窮嗟砭砭之下材費琢磨之微功忝藍田之雙璧追玉樹之遺風乘寶賢之盛際豈信美而不庸儻玉人之一顧庶觀光於羣玉之峰

荆山璞賦

元孔澮

繫荆山之精兮鍾南紀之地靈太和塊垺兮至寶以生偉茲璞之孕瑞兮后祗協而儲禎嗟一卷之未剖兮妙

腹蘊而天成藏瑰竒於山骨兮羌匪瓊而匪璞若一規
之渾淪兮含太極於素形春陽動地兮若燠而栗涼飈
掠木兮若振而聲火流石裂兮崖屋借蔭林谷凝沍兮
託溫以榮雲興而白虹晝見日出而晴煙曉蒸鏜彩薄
崑岡之燄含輝失夜光之明山暉而暖翠欲滴木潤而
寒梢擁青璆琳琅玕晦形而隱質瑤琨琬琰遁魄而韜
英苟是璞之不遇終茲山而鎮寧幸卞和之賞識躋茲
璞而上升璞遇和而益重和遇璞而弗輕肯韞匱而緹

襲顧持獻於明廷錯砮砮而莫辨奄擲地而鏗鉤嗟再
獻而再刖仰泣泣而拊膺蹇至璞之我厄差持此而焉
徵矢予心而弗渝益抱璞而兢兢感嗣主之見知致良
工而起驚剖一殼之鴻濛判玉石於衡平諧明識之一
顧實價重於連城嗚呼和不自寶故獻厥君楚不此寶
惟寶善人謂此寶之遇邪故楚得以歸乎趙謂此寶之
不遇邪故趙得以反乎秦嗟秦城之不償賴相如之主
人復全璧以我歸寧久屈而終信猗歟我元一視同仁

所寶惟賢多士彬彬明廷列圭璋之聞望朝著鐔珂珮
之搢紳玉堂之風月如畫奎章之瑤閣飛雲昂昂瑚璉
之噐煌煌席上之珍登賢能於天府徵黎獻於海濱各
懷材以自見孰抱璞而隱淪愚生斯世琢磨日新惟善
賈以待沽保厥美於忠貞外璞質而弗章內玉德而存
誠際明良之嘉會登風雲之要津叫閭闔之九重披琅
玕以自陳

荆山璞賦

元
文逢原

客有仰觀乾象俯辨坤方睇翼軫之淪精知至寶之韜
光步熊繹之故墟凜寶氣之麗涼朝發軔於方城夕弭
節乎荆之陽摘鬼神之姦祕啟山澤之妖藏眩神光之
暉霍得美璞於崇岡觀其陽紋綜錯陰縕網瑤草藉
其虹光碧蘚暈其龍鱗散餘彩之庚庚凝乎尹之續續
信太和之精粹鍾元氣之真淳毓自異於璠璣夫豈混
於砭珉超楚產而夔絕匪繄丹之與鄰韜至美以內蘊
煥明德之外新昭聞望之顥顥儼文質之彬彬渾兮太

樸溫其陽春闌珍燭乎岷嶓之顙流液濺乎江沱之濱
以之為圭璧可以輯瑞於皇家以之為瑚璉可以薦禧
於明神藍田之質不足以麗美垂棘之璧未可以等倫
是宜曠千載而亦遇夫豈輕售而自陳者哉於是拭之
以玄纁之密麗濯之以滄浪之清漪重之以什襲藉之
以重綬聞楚王之貴寶也歷郢都而獻之王方雜百寶
以零亂眩衆目之盱眙寸珠照乘今錯落尺璧連城兮
陸離競華藻於錙銖角纖巧於毫釐勃然顧謂羣臣曰

彼可謂懷璞以自售而獻芹之無知吾觀其所獻者特
渾然而圭角不露樸然而質實無奇得非相與為欺乎
迺具憲章爰敕有司錫之以踊拒之以辭客乃益允信
以自寶終不忍於遐遺望君門而再獻責愈嚴而愈危
於是喟然而歎戚然而噫曰吾寧混跡硤硤乎抑將自
銜其瑾瑜乎吾寧韞匱藏諸乎抑將待價沽之乎物固
各有所遇兮遇固各有其時鑒至寶於未遇兮匪知音
其為誰遂抱璞沈吟矢之以詩曰璞楚產兮岳祗炳靈

坤珍萃兮紛此內美渾然天成德無媿兮玉以比德蹇
余好修不遐棄兮抱彼璞兮或三獻兮為國之瑞乎

繅藉賦

以圭瑞之藉文藻為飾為韻


宋

陳襄

器由禮制飾貴文為嘉寶圭之致用資繅藉以成儀絢
組交陳妙極彰施之度縷綦錯布光含溫潤之姿聖典
遐稽邦儀順考謂玉器之攸重欲朝家之永保必有藉
以承其瓌異必有飾以加其文藻英華挺制誠資飾色
之工廣袤中儀式蘊非常之寶炳作良具裁成茂規詔

玉人而慎守飭典瑞以勤司莫不昭其文也禮以行之
備三采五采之容中含瑞信分一就再就之式內掩瑰
奇其或朝有多儀國陳大事君臣分上下之等珪璧顯
尊卑之贄非繅無以成其飾非藉不能承其瑞木為內
幹蔽瑜瑾以光昭韋作外衣煥朱蒼而色異蓋夫國有
至寶時稱大圭儻非加於慎重誠有患於顛隳故我制
藻率以為用表禮文而可稽有方有圓式薦諸侯之瑞
授賓授介終高十襲之緹若然則昭備禮容欽承玉德

周陳藻績之制密蔽乎尹之色炳然發彩侔水草以成章煥乎有文異錦琮而著飾故得規模煥備等數咸分蘊六玉而中度昭大采以成文彼武有韃橐但取包戈之用使持英蕩徒彰輔節之勲曾未若保茲希代之珍重爾連城之價欲節度以無越設縲文而是藉宜乎自天子達於諸侯致等威而相亞



御定歷代賦彙卷九十六